

台文筆會成立大會現場所感

文／劉承賢 台師大台文所研究生

咱台灣人m̄是 tsín tsiah tú開始用母語書寫，有現代文學款式ê創作，咱已經從事百外冬--a，按呢講--起來，tsit个台文筆會ê成立，實tú實m̄是20外冬後ê 1个意外，是1个慢「分」百外冬ê必然--lah。

台文kap台灣，差1字niā-niā，1字thài-thó有20 thóng年hiah長，台灣筆會kám m̄就是寫台文ê筆會？寫台文ê人kám m̄就是beh成立台灣筆會？Tsit个想法真直接，m̄-koh無hām事實saⁿ tsih-tsiap，也莫怪我bat聽見連會員to有人誤會2009年11月21成立--ê，是台「灣」筆會。

咱當然知影1987年就成立ê台灣筆會tī文學kap啟蒙tāk方面ê貢獻，m̄-koh咱若無堅持用母語來書寫，筆水是beh按怎ē止咱心--裡ê枯tâ？Tse水明其然m̄是新開ê泉，m̄-tsih籌備會主任委員，也就是當選第一屆理事長ê李勤岸ē tī成立大會致詞ê時講：咱台灣人m̄是tsín tsiah tú開始用母語書寫，有現代文學款式ê創作，咱已經從事百外冬--a，按呢講--起--來，tsit个台文筆會ê成立，實tú實m̄是20外冬後ê 1个意外，是1个慢「分」百外冬ê必然--lah。

Tsit-ē入去到台灣文學館第1會議室，頭tsit个感覺，就是大會準備kah有條有段、kài幼路tī--leh，招待人員有特別梳妝打扮，報到處簽名、納會費ê所在有人引導兼說明，1站1站，真有秩序，mā真親切，無因為人濟起混亂，等入會費、常年會費納suah，giáh頭tsit-ē看，壁頂用來做選票計算ê海報已經齊整整貼kah好勢好勢，會場hit片頭，用紅、黃做主色ê banner，kap現場歡頭喜面ê會員hām來賓，hō人1種辦喜事ê心情。

筆會包括發起人在內ê創會會員有66人，內中

有34个親身出席成立大會，另外23个委託出席，加上來賓kap記者，m̄-nā是報到、納會費ài 1个1个確認，理監事選舉ê事務koh-khah是需要ka-nng ê計劃營為，tse，kap進前ê發起人會、籌備會議來比，有ke真複雜，m̄-koh tsit个會確實辦kah有站有節、有兜有sau。

Tsit號觀察m̄是烏白褒so，1位久長參加社團活動ê有志，tī會後3月日tsiah久了後，koh親身kā我講：「我去hō筆會成立大會驚--著，tāk項lóng做kah hiah斟酌hiah正式，我參加濟濟社團，猶m̄-bat看過做kah tsiah頂真--ê！」我聽著伊按呢講，心內感覺驕傲，因為tsiāⁿ做筆會1份子，咱用行動kap tsiâu全ê準備，透過成功ê大會，向外界宣示咱m̄是蜈蚣跋、蛤仔手，咱是台語文學ê khiàng較兵、前鋒陣，咱有內才mā有場面，一來二去，tiòh多謝籌備會總幹事、筆會祕書長胡長松，kap hit工包括蔣為文台語研究室ê幾若位同工無閒報到、收費、接待kap選務、蘇頌淇協助翕相、hām臨時tàu pha-sa監票、唱票等等khang-khuè ê有志，tī tsia不管有tsē名無tsē名，濟濟用時間出氣力tàu支援ê朋友，我相信列位會員kap來賓lóng有看著in ê付出，大會規个流程ē-thang tī盛大koh帶輕鬆ê氣氛當中，進行kah put-tsi-á順sī，in有影是功勞者。

大會hit工來賓真濟，包括台南市副市長洪正中、台南市議員李文正、台南市議員邱莉莉、台

南市政府文化觀光處劉怡蘋、立委陳亭妃服務處主任張文雄、成大台文所吳美臻、真理大學黃輝爵、台南市台灣語文學會巫義淵、台灣羅馬字協會張復聚、鄭兒玉牧師等人，若beh照實講，頂懸tsit个名單是我ui會議記錄抄--來-ê，koh來賓tī台仔頂講啥我早就bē記--得-a，相信濟濟人hām我sio-siàng，ē留tiàm記持--ê，m̄是hit幾分鐘好聽ê面前話，永永是無分會員來賓，in中間啥物人綿爛綿精透過行動支持母語文學、或者是親身用筆學習kap實踐母語寫作，in ê人就準無行踐到，咱to也熟似--in，in就準無話無句，咱ê心內mā直直出運聲（īn-siaⁿ）。

成立大會自頭kah尾，hōo人印象上深--ê是啥，無來ê人凡勢臆無，若問我ê看法，我ē講是suī條討論章程ê過程。有社團經驗ê人，檢採pān-phue tse是kài無藝量ê代誌，若有代先tshui-tshiâu--過，甚至ē先招幾個仔重要成員私跤ē開會前會，確定章程版本，了後tī正式大會就透過議事手路緊緊hōo過，khah免生枝生葉、頭khah大身。總--是咱ê人無按呢想，咱是老老實實1條仔1條將章程讀--過，參考逐个ê意見，tsiū法律效果kap用字派詞討論、修改、說明、決議，tsit个做法，m̄是干焦尊重suī个會員tsit層意義，koh有透過比論陳明仁、廖瑞銘、丁鳳珍kap李勤岸列位有志ê聲音，用台語大聲tī現場朗讀ê效果。聽he用母語kuàn透、綴聲調起落親像音樂ê字句，加上討論中間不時傳出笑聲，硬tsiaⁿ ê章程條文擬定，mā變做會議中tsiàⁿ心適ê 1部份。

提案討論suah，進入臨時動議，蔣為文提案請台文筆會主動邀請友好社團做伙連署，向教育部建議台灣母語文學獎尊重得獎者使用漢羅書寫

的權利。Tsit个案真緊得著大會接納、通過。在我來看，tsit个動議ná像是1枝度針。咱攏知台文書寫自來有漢字、羅馬字ê區分，作者因為個人慣勢、文字認同、其他考慮等等ê起致，suī人對文字系統ê看法kap實踐真oh會齊，台文筆會kah是台文書寫者ê組合，會員內中對文字使用ê意見自然有無全，m̄-koh suah ē-tàng互相包涵、saⁿ-kīng，tsit款精神若ē-tàng接一，咱ê陣營bē hiah簡單就hōo人使弄分化，咱有母語做黏糊tong勻sio挽sio牽，無beh做bē做堆ê沙，因為做沙m̄是咱ê運命--lah！咱ê島嶼tsīng-kah-taⁿ直直有來來去去ê雄狂風，咱若註定tiòh tshīⁿ風，咱定著ài學ē-hiáu tsiⁿ風，做沙除了hōo人吹kah iā-iā飛，掃掃去角勢以外，倚bē穩在，是beh按怎kā土地khīⁿ tiâu--leh，mài tuè水趁風跋落去海底？

2009年11月初5出刊ê《Current Biology》，科學家發表in對拄出世ê紅嬰仔哭聲ê研究，發現就準是落土tsiah兩工ê紅嬰仔，in teh吼ê聲，就已經表現出in tī未曾出世進前所聽著ê語言懸低起落ê me-lóo-lih--a，我相信我聽見「台文筆會」tsit个幼嬰11月21出世所出歡喜ê音聲，是伊tī未曾出世ê代先就學--來-ê，是和齊、歡喜、明氣ê兆頭。我也teh等，he拖長ê喉叫beh堅做色水koh樣ê音節，長長短短伊beh唱正港ê台灣文學之歌，tsit个世界做伊去失覺察規百冬--lah，m̄-koh，無久，tsit-ê受忽略ê歌聲，人tsāi-tsuī ē耳空phak-phak，bē-khat-kin注神愛聽。☒